

**Rombakan Kecil Dalam Kerajaan Negeri Selangor, Adun Sijangkang Jadi Exco Bernama
18 Januari, 2012**

SHAH ALAM, 18 Jan (Bernama) -- Kerajaan Negeri Selangor membuat rombakan kecil dalam pentadbirannya dengan portfolio Hal Ehwal Islam, Infrastruktur dan Kemudahan Awam diambil alih oleh Menteri Besar Tan Sri Abdul Khalid Ibrahim.

Ketika mengumumkan demikian hari ini, Abdul Khalid berkata portfolio Adat Resam Melayu, Belia dan Sukan negeri pula disandang oleh Anggota Dewan Undangan Negeri (Adun) Sijangkang yang juga Yang Dipertua PAS Kawasan Kuala Langat Dr Ahmad Yunus Hairi.

Dr Ahmad Yunus, 47, berkelulusan Ijazah Perubatan dan Pembedahan dari Universiti Malaya, menggantikan Datuk Dr Hasan Ali, yang telah dipecat dari PAS pada 8 Jan lepas.

Hasan sebelum ini merupakan Pengerusi Jawatankuasa Hal Ehwal Agama Islam, Adat Melayu, Infrastruktur dan Kemudahan Awam Selangor.

Abdul Khalid berkata Dr Ahmad Yunus dilantik memegang portfolio itu kerana beliau pernah menjadi pembantu exco untuk portfolio Belia dan Sukan sebelum ini. Portfolio ini dipegang oleh Menteri Besar.

"Saya percaya Dr Ahmad Yunus boleh menjalankan tugas dengan baik berdasarkan latar belakangnya sebagai seorang doktor yang telah banyak memberi khidmat kepada rakyat," katanya kepada pemberita selepas menghadiri upacara angkat sumpah Dr Ahmad Yunus sebagai exco di hadapan Sultan Selangor Sultan Sharafuddin Idris Shah di Istana Bukit Kayangan di sini.

Abdul Khalid turut mengumumkan ADUN Meru Dr Abd Rani Osman dan ADUN Bandar Baru Bangi Dr Shafie Abu Bakar masing-masing dilantik sebagai Pengerusi Skim Mikro Kredit Miskin Luar Bandar (SKIMSEL) dan Pengerusi Perbadanan Adat Melayu dan Warisan Negeri Selangor (PADAT).

Kedua-dua jawatan itu disandang oleh Dr Hasan Ali sebelum ini.

Pada sidang berita sama, Dr Ahmad Yunus berkata pelantikannya sebagai anggota exco memang di luar jangkaan sebab spekulasi sebelum ini mengatakan Dr Abd Rani akan dicadangkan mengisi jawatan itu.

Dr Abd Rani, yang merupakan Pesuruhjaya PAS Selangor, menjelaskan beliau tidak berminat menjadi anggota exco kerajaan Selangor.

Katanya beliau merestui pelantikan Dr Ahmad Yunus sebagai exco baru dan berpegang kepada keputusan Jawatankuasa PAS Pusat yang mencalonkan beliau ke jawatan itu, katanya.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=640864>